

ՀՀ ֆինանսների նախարարություն

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 42/1

27 հոկտեմբերի 2015 թ.

Քննարկվեց Ա/Ձ Ռոբերտ Գալստյանի 28.09.2015 թ-ի դիմում-բողոքը:

Ա/Ձ Ռոբերտ Գալստյանի բողոքում բերված փաստարկները.

Ա/Ձ Ռոբերտ Գալստյանը բողոքարկում է արձանագրությունը, քանի որ որևէ խախտում չի կատարել: Բացի այդ, իր կողմից ներկայացվել է 1-ին եռամսյակի շրջանառության հարկի հաշվետվությունը, սակայն 2-րդ եռամսյակում Կապանի ՏՀՏ-ում տեղեկացրել են, որ պետք է ներկայացնել ԱԱՀ-ի հաշվետվություններ, ինչն իր կողմից կատարվել է: Բողոքաբերը հայտնում է նաև, որ 1-ին և 2-րդ եռամսյակների համար ԱԱՀ-ի հաշվարկներ ներկայացնելու վերաբերյալ ծանուցվելուց բացի այլ ծանուցում չի ստացել:

Հաշվի առնելով, որ ԱԱՀ-ի հաշվարկներ ներկայացվելու պայմաններում սոցիալական վճար չի առաջանում, այն դեպքում, երբ իր կողմից սոցիալական վճարի գծով վճարվել է 15000 դրամ:

Բացի այդ, Ա/Ձ Ռոբերտ Գալստյանը ցանկանում է տեղեկանալ, թե ինչու է տուգանքի չափը 20.000 դրամ կազմել, չէ որ իրենից վերցրել են 1-ին եռամսյակի հաշվետվությունը:

Ելնելով վերոգրյալից՝ Ա/Ձ Ռոբերտ Գալստյանը խնդրում է փոխել կամ վերացնել արձանագրությունը և հետ վերադարձնել ավել վճարված 15.000 դրամը:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ Ա/Ձ Ռոբերտ Գալստյանը 2015 թ-ի 1-ին և 2-րդ եռամսյակների համար ներկայացրել է շրջանառության հարկի հաշվարկներ: Սակայն, հաշվի առնելով այն հանգամանքը, որ Ա/Ձ Ռոբերտ Գալստյանի կողմից սահմանված կարգով չի ներկայացվել շրջանառության հարկ վճարող համարվելու վերաբերյալ հայտարարություն, Կապանի ՏՀՏ կողմից 26.06.2015 թ-ին նրան ուղարկվել է իրազեկման թերթիկ՝ «Ավելացված արժեքի հարկի մասին» ՀՀ օրենքի 3-րդ հոդվածի 1-ին կետի համաձայն ավելացված արժեքի հարկ վճարող համարվելու մասին: Այնուհետև, 10.07.2015 թ-ին իրազեկվել է նաև 2015 թ-ի 1-ին և 2-րդ եռամսյակների համար ԱԱՀ-ի հաշվարկներ ներկայացնելու վերաբերյալ: Ընդ որում հարկ է նշել, որ Կապանի ՏՀՏ կողմից փոստային ծառայության միջոցով 30.01.2015 թ-ին Ա/Ձ Ռոբերտ Գալստյանին է ուղարկվել ծանուցագիր՝ շրջանառության հարկ վճարող համարվելու վերաբերյալ հայտարարություն ներկայացվելու վերաբերյալ:

Ա/Ձ Ռոբերտ Գալստյանը 20.07.2015 թ-ին ներկայացրել է 2015 թ-ի 1-ին և 2-րդ եռամսյակների ԱԱՀ-ի հաշվարկները: Նշված հաշվարկները սահմանված ժամկետներում չներկայացնելու համար հաշվարկվել է տուգանք՝ գումարով 842 դրամ:

2015 թ-ի հունվար-մայիս ամիսների համար «Եկամտային հարկի մասին» ՀՀ օրենքի 10-րդ հոդվածի համաձայն հաշվարկվել է 25.000 դրամ եկամտային հարկ: Միևնույն ժամանակ, Ա/Ձ Ռոբերտ Գալստյանի կողմից 2015 թ-ի ընթացքում վճարվել է 30.000 դրամ եկամտային հարկ:

Ա/Ձ Ռոբերտ Գալստյանի՝ 2015 թ-ի ընթացքում ԱԱՀ վճարող համարվելու պատճառով կատարվել են նրա եկամտային հարկի գծով գումարների վերահաշվարկ: Մասնավորապես, անձնական հաշվի քարտում առկա 30.000 դրամից պակասեցվել է 2015 թ-ի 1-ին և 2-րդ եռամսյակի ԱԱՀ-ի հաշվարկներով առաջացած պարտավորությունը՝ գումարով 14060 դրամ, ինչպես նաև 842 դրամ հաշվարկված տուգանքը: Արդյունքում, եկամտային հարկի գծով գերավճարը կազմել է 15098 դրամ, որը Ա/Ձ Ռոբերտ Գալստյանի կողմից 2015 թ-ի տարեկան եկամտային հարկի հաշվարկ ներկայացնելու դեպքում ենթակա կլինի վերահաշվարկման:

Հաշվի առնելով այն հանգամանքը, որ Ա/Ձ Ռոբերտ Գալստյանի կողմից սահմանված ժամկետում չի ներկայացվել 2015 թ-ի 1-ին եռամսյակի ԱԱՀ-ի հաշվարկը, ՀՀ ՖՆ իրավաբանական վարչության պետի 19.09.2015 թ-ի վարչական իրավախախտման գործի վերաբերյալ թիվ 297278/11 որոշմամբ բողոքաբերը ենթարկվել է վարչական պատասխանատվության՝ գումարով 20.000 դրամի չափով:

Ինչ վերաբերվում է բողոքաբերի այն հարցադրմանը, թե 2015 թ-ի 1-ին եռամսյակի ԱԱՀ-ի հաշվարկը Կապանի ՏՀՏ կողմից ընդունվելու պայմաններում ինչու է տուգանքի չափը 20.000 դրամ կազմել, ապա այդ կապակցությամբ հարկ է նշել, որ քննարկվող դեպքում Ա/Ձ Ռոբերտ Գալստյանի կողմից խախտվել են «Վարչական իրավախախտումների վերաբերյալ» ՀՀ օրենսգրքի 169.1-րդ հոդվածի 2-րդ մասի դրույթները, որի համար նախատեսված է պատասխանատվություն՝ 10.000 դրամից մինչև 20.000 դրամը:

«Վարչական իրավախախտումների վերաբերյալ» ՀՀ օրենսգրքի 242.2-րդ հոդվածի համաձայն հարկային մարմինները քննում են սույն օրենսգրքի համապատասխան հոդվածներով նախատեսված վարչական իրավախախտումների վերաբերյալ գործերը իրեն վերապահված իրավասությունների շրջանակներում: Հարկային մարմինների անունից վարչական իրավախախտումների վերաբերյալ գործեր քննելու և վարչական տույժեր նշանակելու իրավունք ունեն Հայաստանի Հանրապետության վերադաս հարկային մարմնի վարչությունների պետերը և հարկային մարմնի հարկային (տարածքային) տեսչության պետերը:

Վերոգրյալից հետևում է, որ օրենսդիրը իրավակիրառողին իրավասություն է վերապահել համապատասխան որոշում կայացնելիս գնահատել գործի փաստական հանգամանքները և ինքնուրույն որոշել տուգանքի չափը՝ ելնելով կատարված զանցանքի ծանրության աստիճանից:

Այսպիսով, տուգանքի չափը որոշելու իրավունքը վերապահված է բացառապես իրավակիրառողին, որը տվյալ դեպքում, օգտվելով իրեն վերապահված իրավունքից կայացրել է համապատասխան որոշում:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Շ Ո Ւ Մ Է՝

Ա/Ձ Ռոբերտ Գալստյանի 28.09.2015 թ-ի դիմում-բողոքը մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել ՀՀ վարչական դատարան:

Հանձնաժողովի նախագահ՝

Վ.ՄԻՐՈՒՄՅԱՆ